

Augustus
2010Posbus 20
Hermanus 7200

	Telefoon	Faks
Hermanus	028 313 8000	028 312 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445
24 Uur Beheerkamer Brandweer	028 313 8000/8111 028 312 2400	

Bulletin

Amptelike nuusbrieff van Munisipaliteit Overstrand

STRATEGIE VIR GROEIBESTUUR

Openbare deelname in die proses om 'n groeibestuurstrategie vir Munisipaliteit Overstrand op te stel, het op 30 Junie ten einde geloop met verskeie uitstekende bydraes wat van individue en organisasies ontvang is.

Hierdie bydraes sal nou deur die konsultant, Urban Dynamics, oorweeg word alvorens die finale strategie aan die Raad vir goedkeuring voorgelê word.

Die behoefte om die volhoubaarheid van die Overstrand se natuurlike en beboude omgewing te verbeter, is iets waaroor die Raad oor die algemeen besorg is en hou verband met die feit dat natuurlike onontwikkelde areas en landbougrond-hulpbronne op die soom van Overstrand se dorpe toenemend deur stedelike ontwikkeling verorber word. Hierdie areas vorm, onder meer, die natuurlike hulpbronnabasis van Overstrand se toerismebedryf.

Ten einde die Munisipaliteit se volhoubaarheid te verbeter, moet die doeltreffendheid van grondgebruik en infrastruktuur asook die voorsiening van gemeenskapsfasiliteite binne die bestaande stadswet verbeter word, soos in die raads-geodkeurde Overstrand Ruimtelike Ontwikkelingsraamwerk (ROR) 2006



Die voorblad van die konsep-strategiedokument

uiteengesit.

Die konsep-strategiedokument kon by munisipale biblioteke in Gansbaai, Stanford, Hermanus, Hawston, Kleinmond en Bettysbaai bestudeer word, en openbare sessies is op Hermanus, Gansbaai en Kleinmond gehou.

Die doelwitte van hierdie strategie is om:

- 'n geïntegreerde beleidraamwerk te

voorsien wat die gedetailleerde beplanning en ontwerp van markgedrewe ontwikkelingsinisiatiewe sal rig en om die samestelling van meer gedetailleerde buurtplanne vir spesifieke areas of geïdentifiseerde geleenthede te informeer;

- dienslewering, infrastruktuurbeplanning en begroting asook die imple-

mentering daarvan te rasionaliseer, te integreer en by te werk as deel van 'n volhoubare, samehangende groeibestuurstrategie vir die Overstrand Munisipale GOP (Geïntegreerde Ontwikkelingsplan);

- ooreenstemming tussen digtheidspatrone, tendense en voorstelle en grondgebruik/soneringsregulasies asook infrastruktuurverwante kapasiteit en toekomstige voorsiening te bewerkstellig; en
- pragmatiese meganismes en prosesse (wisselende van area wye tot plaaslike vlak) te identifiseer ten einde die gepaste beplande implementering en bestuur van hoër digthede te fasiliteer en te ondersteun.

Meganismes wat gebruik word om die voorafgaande te verwesenlik, moet sensitief wees vir die spesifieke karakter, erfenis en omgewing (bebou en natuurlik) asook die sosio-ekonomiese behoeftes van die onderskeie plaaslike areas. Die gefinaliseerde beleid en verwante strategie vir groeibestuur sal 'n mate van sekerheid verskaf rakende die ligging, vorm en digtheid van toekomstige ontwikkeling en groei wat vir die spesifieke plaaslike area in die vooruitsig gestel word.

FELLE OPTREDE WAG OP SPOEDOORTREDERS

Munisipaliteit Overstrand se kontrak met TCS, die voorloper in Suid-Afrika sover dit ondersteuning vir wetstoepassing ten opsigte van snelheidspere betref, is nou behoorlik in plek en oortreders kan verwag dat daar streng teen hulle opgetree sal word.

Hierdie aanstelling is weens 'n appél ooreenkomstig die munisipaliteit se verkrygingsbeleid verdraag. Altesame het ses firmas vir hierdie kontrak getender, wat na raming R1,8 miljoen per jaar sal beloop. Die presiese bedrag hang af van suksesvolle dienslewering aan die kant van die maatskappy aangesien sy maandelikse vergoeding bereken sal word ooreenkomstig die boetes wat binne 'n kalendermaand betaal word.

TCS is vir twee jaar, eindigende 30 Junie 2011, op kontrak aangestel om die nodige tegnologie en agterkantoor administratiewe dienste te verskaf ter versterking van die munisipaliteit se funksie om wetgewing betreffende spoedoordredings toe te pas.

Hierby ingesluit is die voorsiening, nasiening en kalibrering van vier mobiele spoedkameras en 14 vaste kameras wat by kwelpunte oral in Overstrand aangebring gaan word, met dien verstande dat die munisipaliteit se aansoek om hierdie plekke as sodanig te klassifiseer deur die Direkteur van Openbare Vervolg goedkeure word.

Spesiale aandag gaan geskenk word aan agterkan-

toor-administrasie wat onder toesig van die diensverskaffer op die persele van die Verkeersdepartement uitgevoer sal word. Die Verkeersdepartement se bestuur sal toesig hou oor die proses, en maandelikse verslae sal aan die munisipaliteit voorgelê word. Agterkantoor-bedrywighede is allernoodsaaklik in wetstoepassing ten einde te verseker dat sake effektief geprosesseer en vervolg word.

TCS is 'n alombekende Suid-Afrikaanse operateur wat reeds 30 jaar sake doen. Met installasies op meer as 116 plekke is TCS die grootste verskaffer van sagteware en kamerategnologie vir die doel van verkeerswetstoepassing in die land. Sy hoofkantoor is in Pretoria, en daar is 'n streekkantoor in Kaapstad. Die firma het 'n gesamentlike onderneming met Debt Collection Services, 'n toonaangewende verskaffer van invorderingsdienste met 'n personeelsterkte van 2 400 en 'n inbelsentrumfasiliteit, aangegaan ten einde te verseker dat oortreders met uitstaande boetes opgespoor en vervolg word.

Overstrand se Verkeersdepartement sal van tyd tot tyd padblokkades oprig en van nommerplaatertekennings-toerusting gebruik maak om dagvaardigings te bestel en lasbriewe vir arrestasie uit te reik.

'n Webwerf sal binnekort beskikbaar wees ten einde die publiek toe te laat om te registreer en toegang tot hul uitstaande boetes te verkry.



Onder die verkeersbeamptes wat onlangs in die gebruik van TCS-toerusting opgelei is, is van links Salomé Abrahams Andele Koli, Chane Davidson, Nino Williams, spt Xen Titus, Tony Blanckenberg, Riaan Neuhoff, TCS-instrukteur Marius van der Westhuizen, Buks Minnie en voor, Yvienne Smith.

HERSIENE GOP MOET WEG NA WELVARENDHEID BAAN

Die Raad het onlangs die hersiene weergawe van die geldende Geïntegreerde Ontwikkelingsplan bekragtig. Hierdie plan is oorspronklik in 2006/7 opgestel en ontwikkel om saam te val met die ampstermyn van die heersende munisipale raad.

Die Burgemeester, Theo Beyleveldt, het by dié geleentheid gesê dat die Raad oor die afgelope paar jaar ten volle tot die besef gekom het dat die sleutel tot die munisipaliteit se bestaan in hierdie dokument vervat is. Strategies het dit die rigting aangedui. Maar insgelyks dien die plan as 'n baken om te sorg dat die gemeenskap, raad en munisipale amptenare op koers bly in hul pogings om 'n stel verbeterde lewensomstandighede vir Overstrand en hul omgewing te bewerkstellig, beperkte hulpbronne ten spyt.

Volgende op die munisipale verkiesings volgende jaar gaan amptenare saam met die nuwe raad en gemeenskapstrukture daarvan werk maak om 'n totale nuwe plan op te stel. Geweie die sukses wat met die heersende plan behaal is, kan daar egter met gerustheid aanvaar word dat alle betrokkenes besef presies hoe belangrik hierdie plan is en dat hulle van die veronderstelling sal uitgaan dat Overstrand die reg het om op selfs 'n beter produk aanspraak te maak, het hy gesê.

Die belangrikste bydrae wat uit die geldende Geïntegreerde Ontwikkelingsplan voortgespruit het, was ongetwyfeld die kort en kragtige dog treffende visiestelling: OM 'N SENTUM VAN UITNEMENDHEID VIR ONS GEMEENSAP TE WEES. Oor die afgelope vyf jaar het hierdie stelling as rigsgoer vir alle betrokkenes gedien, het die Burgemeester gesê. Hy het ook die hoop uitgespreek dat dit oor die jare vorentoe as baken sal dien vir diegene wat die koers moet bepaal.

Voorts het die Burgemeester opgemerk dat om 'n GOP op te stel en by te werk uiteraard omvattende samewerking met gemeenskappe noodsaak ten einde te verseker

dat alle belanghebbers die kans gegun word om hul saak te stel. In die lig hiervan is heelwat tyd daaraan bestee om met wykskomitees, organisasies en belanghebbers in gesprek te tree ten einde vas te stel presies wat ons mense se behoeftes is. Sodoende, het die Burgemeester opgemerk, het die Raad nie net insae in die uiteenlopende aard van ons gemeenskappe verkry nie maar ook tot die besef gekom dat sommige van Overstrand se waardevolste maar nie noodwendig altyd mees waardeerde bates uiters kwesbaar is. Hieronder tel veral die natuurprag waardeur ons omring word.

In kort, volgens die Burgemeester, beklemtoon 'n GOP presies hoe belangrik dit is dat diegene aan die spits van plaaslike regering nie die bal uit die oog moet verloor nie en nooit moet afwyk van bestuurspraktyke wat tegelyk doeltreffend, doelmatig en ekonomies is nie. Dit, sê hy, is die enigste manier waarop 'n raad kan verseker dat sy strategiese doelwitte verwirklik word: hetsy oor die kort-, medium- of langtermyn.

In sy rede het die Burgemeester Beyleveldt ook melding gemaak van die nasionale regering se OMMEKEERSTRATEGIE, 'n strategie wat daarop afgestem is om die meerderheid van ons mense se vertroue in munisipaliteite te herstel. Munisipaliteit Overstrand onderskryf die strategiese doelwitte van hierdie strategie ten volle.

GEMEENSAPSPOLISIEFORUM



NOMMER VAN HUISE

Volgens oorlewering was Parys die eerste stad om in 1512 huisnummering langs die Notre-Dame in te voer. In Europa en

Suid-Afrika is dit algemene praktyk om elke perseel aan die een kant van die straat met stygende onewe getalle beginnende by 1 te nummer en dié aan die ander kant met stygende gelyke getalle beginnende by 2 of, soms, 0. Die onewe nommers is gewoonlik aan die linkerkant van die pad wat in die rigting kyk waarin die nommers styg. Waar bykomende geboue ingevoeg of erwe ondverdeel word, kry sodanige persele gewoonlik 'n alfabetiese letter as agtervoegsel, byvoorbeeld 10A en 10B.

Die Britte het in 1765 begin om persele te nummer ten einde die Postage Act van dieselfde jaar tot uitvoer te bring. Sommige plaaslike owerhede in die VK skram daarvan weg om die getal 13 vir die numerering van huise te gebruik weens die bygelooft dat hierdie nommer ongelukkig is.

In Holland gebruik die dorp Haarlem rooi nommers vir woonstelle op boonste verdiepings. In die VSA word huise in strate wat van noord na suid loop selfs anders genummer as dié in strate wat van oos na wes loop. Voorts word

mense in die VSA 'n boete van \$500 (R3 750,00) opgelê sou hulle nalaat om hul huise te nummer.

Al die voorafgaande inligting het ten doel om u as inwoner van Overstrand aan te moedig om u huis behoortlik te nummer aangesien alle Gemeenskapspolisieringsforums in die algemeen hiermee probleme ondervind. Om huise te nummer mag dalk na 'n beuselagtheid klink, maar dit kan potensieel lewens red.

U kan die lewe vir die manne en vroue in blou soveel makliker maak, en somer dié van ander diensverskaffers met uniforms in 'n hele paar ander kleure ook. Op hierdie wyse sal u hulle help om u huis baie vinniger te vind wanneer hulle uitgeroep word of 'n klagte ondersoek. 'n Gebrek aan huisnommers beteken dat reaksietye stadiger is, wat weer aanleiding gee tot negatiewe persepsies van die polisie en ander instansies se dienslewering.

In belang van u eie veiligheid, doen die regte ding: nummer u huis. As u nie weet wat die nommer is nie, klop by u naaste munisipale kantoor om hulp aan.

Indien u enige voorstelle ter verbetering van gemeenskapsveiligheid het of vraagstukke wil bespreek, kontak Hennie Westraat, Voorsitter van die Hermanus-GPF, by 082 820 4811.

KALFIEFEES HULDIG UYS KRIGE

As hoofborg van die jaarlikse Kalfiefee, is die Munisipaliteit Overstrand trots daarop dat dié kunstefees nie net homself al stewig op die Wes-Kaapse kalender van gebeure gevestig het nie maar ook reeds tien jaar lank suksesvol aangebied word.

Vanjaar se fees begin op Donderdag 5 Augustus en duur tot Maandag 9 Augustus en gaan weer 'n kookwaterervaring aan besoekers bied!

Hulde word aan Uys Krige, 'n eertydse inwoner van Onrus wat vanjaar 100 sou word, gebring met *Die Ryk Weduwee* waarvan die sterbelaaide rolverdeling onder andere Elsabe Daneel insluit.

Die befaamde digter Petra Müller is die ontvanger van 2010 se Kalfiefeeesteel en gaan haar werk tydens een van die aanbiedings in die Roostent bespreek. Verskeie ander skrywers en boeke gaan ook onder die loep kom.

Onder die skitterproduksies tel *Dinsdae by Morrie* met Chris van Niekerk en Pedro Kruger wat onlangs by die Volksbladfees uitverkoop het en *My Sarie Marais* met Hanli Rolfe en Deon Coetzee.

Twee Engelse produksies, die bekende *Normality* deur Hennie van Greunen met Pedro Kruger en die kome-

die *Monkey Nuts* met Matthew Ribnick, word spesiaal vir Engelse toneelliefhebbers opgevoer terwyl die kinders ook nie afgeskeep word nie met *Iets uit Niets* en *Rooskappie en die Wolf*.

Immergewilde musieksterre soos Amanda Strydom, Mathys Roets (*Droomvrouens*), Adamsappel en Niël Rademan (*Klassiek tot Kabaret*) tree ook by die fees op, en vir liefhebbers van die klasië is daar 'n *Simfoniekonsert* met die Universiteit Stellenbosch Camerata.

Die Groot Debat, 'n politieke ontbytbesprekingsprogram, se onderwerp is *Demokrasie of Nie?* astema.

Die Vrouedagontbyt, 'n saamspanning van die burgemeestersvrou Maraai en die Kalfiefee, se tema is *Eva, klim uit jou Boks*, en by dié geleentheid sal Overstrand se *Vroue van die Jaar* vereer word.

Doen besprekings by die Kalfiefeeskantoor in Onrus of skakel 028 316 1687, of besoek ons webwerf www.kalfiefee-hermanus.co.za vir meer inligting.

WALVIS-VERJAARDAGPARTYTJIE

Op Dinsdag 22 September 2009 bied Maraai, in samewerking met die Walvisfees-komitee, 'n "verjaardagpartytjie" vir die sewentigplussers van Groter Hermanus aan. Dit begin om 10:30 in die Sandbaaisaal. Plaaslike kunstenaars gaan die gaste vermaak. Afsonderlike partytjies word later vanjaar in Hangklip-Kleinmond en Gansbaai/Stan-

ford aangebied

Indien u belangstel om kaartjies vir hierdie partytjie te bekom, of om as gasvrou vir 'n tafel op te tree, kontak asseblief vir Elize Verrij by tel 028 313 8058, faks 028 313 8067 of e-pos everrij@overstrand.gov.za

RUSSIESE PIANIS HIER

OAK gaan op Vrydagaand, 6 Augustus, tydens die Kalfiefee op Hermanus die gemeenskap bekoor met die sang van die gewilde Tygerberg-kinderkoor onder leiding van Hennie Look. Die uitvoering gaan in die NG Kerk op Hermanus plaasvind. Op Vrydagaand, 27 Augustus vier ons CHOPIN en sal die Russiese pianis, Vassili Primakov, ons kunstenaar wees. Besprekings vind soos altyd plaas by BELLINI op 028 312 4988. Rig navrae asseblief aan René du Plooy op 082 940 4238 of renedup@telkomsa.net



Tygerberg Kinderkoor